

## Lauga mo te Fakatauga Tupe 2015

### Mai i tena Malu Maatia Toafa

#### Minisita o te Tupe mo te Aofagaga o Maumea

16 Tesema 2014

#### FAKAALOALOGA

1. Te Malu ote Takitaki Fono ki te Fale o Palamene, Te Malu ote Ulu ote Maalo mo tou faletua, Sui malu ki te Palamene mo oulua faletua, Malu ote Pelesitene ote Ekalesia Kelisiano Tuvalu EKT, Malu o te Sui maluga o Saina se Kominisi ki Tuvalu, Malu o te UluFenua o Funafuti pela foki mo Toeaina o fenua takitasi i luga i Funafuti nei, Ulu Aliko, Tupu, Pule o Kaupule mai Nanumea ki Nukulaelae, Failautusi ki te Maalo, Failautusi Tumau mo Ofisa matuatua o te Maalo, Menetia o Kamupane ate Maalo, Sui mai Pisinisi mo Fakapotopotoga se kau ki te Maalo, Tino kami mo te Atufenua katoa e fakalogologo mai.

#### FAKATOMUAGA

2. E pela mo te Sekisini 165 o te Fakavae o Tuvalu, ko fiafia lasi au o tuku atu ki mua o te Fale Malu o te Palamene ate Fakataugatupe mo te tausaga 2015.
3. Te Fakatauga Tupe 2015 ne fakavae mai luga i kausakiga kolaa ko oti ne fakataunugina ke atili fakalei atu a tulaga o galuega ote Maalo. A te Maloo e tumau a tena lagoon maalo o fakaoko atu a tulaga kesekese katoa o galuega lei ki tino o te Atufenua, fakatasi mo te aofagaga fakalei o tulaga o mea tau tupe, pena foki a te matematega o galuega atiake i luga i tou Atufenua mo te lei saukatoa mo aso mai mua. Tou Malu te Takitaki Fono, ko fiafia lasi au o fakailoa atu:
  - i) Me i te aofaki katoa o tupe maua mo te Fakataugatupe Tupe 2015, e fakatautau ki se aofaki e tusa mo te \$44.2 miliona. E aofia iei te \$8.7 miliona tela ko te vaega mai i te Tupe Fakanaa (TTF), \$8.9 miliona mai lafoga (income tax), \$17.0 miliona mai laisene o vaka faika mo te \$5.4 miliona mai i te feagaiga o te dotTV. Mai tafa iei, e fakatautau ki se \$11.5 miliona ka maua mai i tou tausagoa fesoasoani mai tua atu o Tuvalu.
  - ii) Te Fakataugatupe mo te 2015 e fakaasi manino iei a te fakaaogaga o tupe mo te lei o Tuvalu mo ana tino mo aso mai mua. Tupe Fakamaumau e fakasaga tonu eiloo ki luga i vaega taua kola e toki i te Te Kakeega II (TKII), Te Alatuu ate Maloo, mo te PRM, maise ki tulagao te ola lei mo akoakoga, fakatuutuu mo te lagoo maloo ki fenua o tatou mai tua atu o Funafuti.
  - iii) Te aofaki katoa o tupe fakamaumau mo te 2015 e fakatautau ki te \$56.2 miliona. Tela e \$39.3 miliona ka fakatupe kiei a te fakataugatupe tutumau ate Maalo, (aofia foki iei te \$693,773 mo CSOs) kae \$13.8 miliona mo fakatupe atiakega a te Maalo (SDE). Mai tafa i kona, e \$3 miliona ka teu ki loto i te Tupe Fakanaa o Tuvalu. Mo te 2015, e tusa mo te \$346,961 i fakamaumauga tupe silia kae ka fakatupegina mai ite CIF.

4. Te Malu o te Takitaki Fono, koi tuai o fakasoko atu tatou ki fakamatalaga likiliki o te Fakatauga Tupe, ke fakaaoga ne au a te avanoaga tenei ofakailoa atu ki oulua maalu, a tulaga o te maumea mo atiakega i loto i te Atufenua kolaa ne fakavae kiei ate Fakataugatupe tenei.

## **FAKATOKAGA OTE FAKATAUGA TUPE**

5. A te fakatokaga o te Fakatauga Tupe ko oti ne fuli fakatau ki taumafaiga a te Maalo o fakalei atu a te tulaga tau tupe. A te fuliga tenei ka taumafai o fakamatala maaea ate fakavaega o te Fakatauga Tupe, fakamaina a faka-tupega foou mote 2015, mo te fakamatalaga maaea o polokalame kolaa ka fakataunugina ne te Maalo mo ona tino.
6. A ikuga mo te Fakatauga Tupe 2015 ne faka takitakigina ne te Palani mo te Fakatauga Tupe (MTFF). A te Palani tenei e fakataata iei a tupe maua mo tupe fakamaumau mai ite tausaga 2015-2017. I te fakatokaga tenei, ne kilogina iei ate tulaga ote maumea saukatoa ote atufenua, te pokotiaga kite olo akaga o togi o mea, mo te mafuilifuliga ki te exchange rate mo te Fakatauga Tupe ate Maalo i polokalame kolaa e manako te Maalo ke fakataunugina mo tausaga konei. A fakamatalaga maea ki mafuilifuliga o fakamaumauga mo tausaga takitasi e fakaasi foki ite Fakatauga Tupe tenei.
7. Mai ite fakamafuliga tenei ko laveagina iei me ite fakatupega o galuega ate Maalo mo te 2015 ka fakavasega ki polokalame kae se ko ulu fakamaumau e pelaa mo te Fakatauga Tupe i te tausaga tenei mo tausaga ko teka. A fakamainaga katoa e maua i te vaega o fakamatalaga ki Fakatauga Tupe mo Ministuli takitasi.
8. Mo te 2015, ne fakatokagina a te faka'mauga o atiakega mo polotieki kolaa ne fakatupegina ne taugaso fesoasoani o Tuvalu e pela mote manakoga ote Tulafono Public Finance Act mo te Tuvalu Development Fund (TDF). A te pogai ne fai iei ate mea tenei, ke mafai o lavea ate ata saukatoa o tupe fesoasoani kolaa ne mauagina ne Tuvalu mai i taugaso fesoasoani. E oko foki ki luga i aofaki tupe kola ne fakatupegina mo atiakega mo polotieki takitasi ka fakaasigina i konei.
9. Te malu ote Takitaki Fono, e fialia au o fakapatonu atu me ka maua ne te Maalo a te aofaki e \$8.7 miliona mai ite Tupe Fakanaa a Tuvalu (TTF) mo te 2015. A te paleni mo te market value o te Tupe Fakanaa ite fakaotiga o Setema 2014 e tusa mote \$148,850,512 miliona kae ko te maintained value e tusa mo te \$140,124,479 miliona.
10. Mai I tafa iei, a te CIF e fakatautau ke \$27.4 miliona a tena paleni mo te fakaotiga ote 2015. A te paleni tenei e aofia iei ate \$1 miliona mai i laisene vaka faika tela ka teu o fakaleoleo mo aso mai mua. E \$346,961 ka tapale mai ite CIF ke fakataunu kiei a fakamaumauga mo te Fakatauga Tupe mo te 2015. I fakanofoga o te Tupe Teu tenei (CIF) e tau o nofo kite 16% ate paleni ote TTF e teugina ite CIF. A te paleni tenei ne fakatoka mo fesoasoani mo fakatupe a manakoga ate Maalo mo tausaga mai mua mafai ko isi se manakoga. Mo te taimi tenei, a te paleni ote CIF e siliga atu kite 16% telaa ko te \$22.4 miliona o te TTF.

- 11.** E tusa mo te 45% tupe maua ate Maalo mai I laisene vaka faika mo te 2015. A tupe maua konei e se mautinoa a tena aofaki e mauagina I tausaga takitasi ona ko te mafuilifuliga ki te fuliga o sene (exchange rates) mote se mautinoa o te taimi e togi mai iei a laisene konei kite Maalo. Ona ko pogai konei, ne aumai iei a te ‘income averaging approach’ ke taumafai ate malo o teu ate tupe silia mai ite \$16 miliona mai I laisene vaka faika kite CIF. I te auala tenei, ka mafai ne te malo o teu a te aofaki e silia atu mai ite \$16 miliona ki loto ite CIF mo tausaga kola ka foliki ate tupe maua mai ite \$16 miliona.
- 12.** Te Takitaki Fono, e taua ke lavea ne tatou me tiga ate tupe silia i fakamaumauga (deficit) o te malo mo te 2015, ne se mafai o fakafolikigina ate tusaga fesoasoani I feitu tau tupe mai I taugasoa fesoasoani o Tuvalu e pela mote Republic of China (Taiwan), Te Pange o te Lalolagi mo Ausitalia.

### **KINAGA OTE FAKATAUGA TUPE**

- 13.** Malu o Takitaki Fono, malu o sui ki tePalamene, ate Fakatauga Tupe tenei e fakapitoa kae amanaia neia a tulaga fakamatea kola e akasaki ke maua iei te lei katoatoa, kae o fakatumau foki te avakaga ote lei mo olaga o tino Tuvalu. A te Fakatauga Tupe tenei e lago maalo kae amanaia neia fakanofonofoga kola e fakamaua kae fakatumau foki ei te lei saukatoa ki tulaga o te ola lei, akoakoga, filemu mote tokagamalie o tino Tuvalu.

### **TUPE MAUA**

- 14.** Muamua, ke fakamaina fakamaea atu ne au te tulaga o tupe maua totino mote Fakatauga Tupe 2015. E fakatauaa a te kiloga mo tupe maua totino aua e fakamasaua mai ei te tulaga taaua ote mafai ne tupe maua o fakatupe a manakoga fakapitoa ote Maalo.
- 15.** I te 2015, ko tupe maua e tusa mote \$44.2 miliona, tela e tusa mo te 6.9 miliona tala (19%) mai luga atu ote fakatauga tupe mo te 2014. Mai tafa o tupe maua konei e tusa mote \$11.4 miliona ka maua mai taugasoa fesoasoani mai tua atu o Tuvalu. Ka fanaifo malie a tupe maua, aua ko tulaga o mafuilifuliga o fuliga o sene (exchange rates) tela ka mafai ei o pokotia tulaga o tupe maua mai laisene o vaka faika pela foki mote dotTV ke oko ki luga i fakatautauga mo tupe maua mai mua nei i te Tupe Fakanaa a Tuvalu.
- 16.** Ko tupe maua mai lafoga e fakatautau ke fanake kite 13% tela kote \$8.9 miliona mote 2015, mo te kiloga me ka tumau pena a te fanakega. Ko te pogai taaua ne ala ei o maluga penei a tupe maua mai lafoga ona ko te maluga o taega i tiute mo te TCT, tusa ei ko kope mo mea fakatutu kola e aumai ki loto ite atufenua mo tulaga o polotieki kola ka kamata ite 2015.
- 17.** Ne fanaka foki ki te 3.7 miliona tala i te 2015 ko tiati a te Maalo (Government Charges) kae ka pena te kiloga mo fakatautauga mai mua nei. Ko tupe maua mai laisene o vaka faika ka fanaka ki te \$17 miliona mote tausaga 2015, tela e maluga atu ite fakatauga tupe mo te 2014 ki se aofaki e \$3.2 miliona. Te fanakega tenei ne mafai ona ko te maluga o te aofaki i te maketi mo aso kolaa ne togi atu, mai lalo ote Vessel

day Scheme fakatasi mo te lei o tupe maua mai te feagaiga mo Amelika (US Treaty Scheme).

- 18.** Mai tafa ikoona, ko oti ne toe fakafoou te feagaiga mo te dotTV i te 2014 kae ne lavea atu ei a te lei o te fanakega o sene maua mai ei ki se aofaki saukatoa e \$4.5 miliona Amelika i tuasaga takitasi. E se gata I koona ko te aofaki e \$500,000 ka mauagina mai te feagaiga mo te dotTV. E isi foki se iloiloga ne fai mo tupe maua mai tiati o te malini (Marine Charges) ne fai ite 2014 kae ne iloa aka me ka isi se fanakega o tupe maua ki se \$200,000 mo te 2015 tela e tusa mo te \$1.8 miliona.

## **TUPE FAKAMAUMAU**

- 19.** Malu o Takitaki Fono, e manako foki au o fakasaga a taku faipatiga mo tupe fakamaumau mote Fakatauga Tupe. Kote aofaki saukatoa o tupe fakamaumau mote 2015 e nofo kise \$56.2 miliona. E aofia ite aofaki saukatoa tenei ko te aofaki e \$13.8 miliona mo feitu ki atiakega (SDE), e \$3 miliona mo fai tusaga o Tuvalu kite Tupe Fakanaa a Tuvalu (Tuvalu Trust Fund), \$706,360 mo statutory kae \$38.7 miliona mo te Fakatauga Tupe. Ate Fakatauga Tupe tenei mo te 2015 e fakamatea ei a te lagoon maalo ki taupulega lei mo olaga o tino Tuvalu.

- 20.** E pela mote fakaasiga muamua, e ui e iloa te aofaki saukatoa o tupe fakamaumau mo atiakega ne fanaka ki luga, a te Maalo ka fakasaga tonu ana fakamaumau tupe ki tulaga fakamateake mafai ei o agai tonu atu ki manakoga mai lalo o te TKII, te Alatu a te Maalo mote Policy Reform Matrix, kae koi taumafai o atafai a tulaga o pokotiaga o tupe fakamaumau i te taimi foki loa tena.

- 21.** I te 2014, ne toe fakalei ne te Maalo a tulaga o te aofaga mo te atafai o mea tau tupe, fakamaumau o kope, atafaiga o tupe maua mai laisene vakafaika pela foki mote fakatauga tupe. Mo te tausaga 2015 ka onono te Maalo kite fakafoouga mote atili fakalei atuga o te atafaiga o auala mo maumea totino i tulaga tau tupe, ke mafai ei o atili lei atu a gasuega mote lei saukatoa o tino Tuvalu katoa.

- 22.** Malu o Takitaki Fono, te tala maea mo tupe fakamaumau koona katoa ite Fakatauga Tupe mote 2015, kae koi fia fakasae aka foki ne au ko te taaua o feitu o tupe fakamaumau a te Maalo mote 2015 kola e fakasaga tonu atu ki tulaga o mafuilifuiga o te maumea mo tulaga taaua kola e fakamatea i te Alatu a te Maalo, PRM mote TKII.

## **GALUEGA FAKATUTU ATE MAALO.**

- 23.** E tusa mote \$5.4 miliona e faka-tupe mo faite a faleakoga fou i luga i Funafuti nei, Nanumea mo Nukufetau. Te Malo ka fakatupe neia se aofaki tupe e \$3.8 miliona mo faleakoga e lua, kae kote toega ka fakatupe katoa ne taugasoa fesoasoani.

- 24.** E \$4.5 miliona ka fakatupe kite toe faitega se ofisa ote Maalo, mote fakamoemoega ke fai fakalei te fale fai fono tulafono (Court House) ote Atufenua mo nisi ofisa ote Maalo. E fakatautau kisee \$1.2 miliona ka fakatupe kiei te toe faite fakalei iga ote Nivaga II.

- 25.** E \$200,000 ka fakatupe mo faite kie i fale talavai (Health Clinics) i luga i Nukufetau mo Nanumea. Ka isi foki se fale tausima masaki ka faite i tafa ote Fakaimasaki lasi o Tuvalu kise aofaki tupe e tusa mote \$50,000. E lima foki a fale fou ka fakatupe mai lalo ote sikima o fale nofo o tino galue (Civil Servant Housing Scheme) kise aofaki tupe e \$287,000. E \$150,000 ka faka-tupe mo fakaoti kie i falepuipui ite 2015. E tusa mote \$200,00 ka fakatupe kite toe faitega fakaleo ote Ofisa o Tokilau i Elisefou.
- 26.** Te masini fakamanava (Oxygen Plant) ka togi ma te fakaimasaki lasi o Tuvalu ke mafai i fale-talavai te tulaga o mea fakamanava ite fakaimasaki i Funafuti nei e pena foki ki fale-talavai i fenua i tua atu o Funafuti. Ite auala tenei ka mafai o fakafoliki te oti vave o mea vai lakau fakamanava ona kote tuai ote aumaiga o mea penei mai fenua mai tua atu o Tuvalu.
- 27.** E \$500,000 ka fakaleoleo mo toe faite fakalei kie i sose kope ote Malo. Te tupe tenei ka fakasoa fakalei nete Ministuli o Tupe mo Atiakaga ote Maumea mote Ofisa Fakatutu ote Malo (PWD). Mai luga ite fakamauga o kope ate Malo, ka fakatoka iei fakalei se palani kite fakafouga o kope ote Maalo. A tupe mote paleni tenei, ka ave i tausaga katoa o fakaleoleo kote mea ke lava mo fakatupe kie i faitega io me kote fakaleiga o kope ote Maalo.

## **AKOAKOGA**

- 28.** Te malu ote takitaki fono, tsui malu kite palamene. Ko fiafia lasi au o fakailoa atu me ko oti ne talia ne te maalo ke avaka te aofaki tupe tela e fakaaoga ki scholarship ate Maalo mai ite \$262,957 kite \$2.6 miliona mote tausaga 2015. Ko fakaaosi mai iei a taumafaiga ate maalo ke avaka avanoaga akoga mote tausaga 2015.
- 29.** Ne fakaofia foki ne te Maalo se \$98,000 mo alauenisi o tamaliki kola e akoga ite Vocational (TVET) ke fakamalosi iei a loto o tamaliki Tuvalu o fakaoga avanoaga konei. E isi foki se kiloga ate maloo ke avaka a tupe fesoasoani ki akoga kola e se kau mai lalo ite maloo mai te \$412,480 kite \$574,980 ke mafai ne akoga konei o fakagalua a faiakoga kola e atamai kote mea ke fakalei a taumafaiga i loto i akoakoga. Te tupe fesoasoani kite akoga ko Fetuvalu ne avaka mai ite \$345,637 to \$470,637 e pena foki kite akoga Asofitu ne fanaka foki mai ite \$66,843 kite \$104,343 mote tausaga 2015.
- 30.** E se gata iei, Te malu Takitaki fono, Te Maalo ko toka o fesoasoani ki akoga o Lasaga Kamata (Early childhood) o avaka te fakatauga tupe o peofuga kite \$307,978 ke fakamalosi iei a faiakoga kola e atamai ke galua ki akoga o lasaga kamata kae ke mafai o fakapau a fakanofonofoga laua ki akoga lasaga muamua.

## **OLA LEI**

- 31.** Tupe fakaavanoa mo tokita tipitipi ite fakaimasaki kote Princess Margaret Hospital e tusa mote \$250,000 ke mafai o fakaaoga ne tino Tuvalu a services e maua i loto ite atufenua mai tokita tipitipi konei kae ke fakafoliki te fakanaa kite Sikima Masaki mo tino Tuvalu (TMTS). E isi foki se fakatauga tupe e tusa mote \$70,000 mo fakalei a

tulaga ote Biomedical and Laboratory testing facilities ite fakaimasaki ke fakalei iei tulaga o sukesukega mo togafiti e mafai o maua ne tino masaki.

32. Ko isi foki se fanaka kite fakatauaga tupe e \$40,000 mo Pharmaceutical Supplies ite Princess Margret Hospital tela e fakaataata iei a fakamaumauga tupe i tausaga ko teka kae ke mafai foki o maua ne togafiti faopoopo pela mote chemotherapy iloo te fakanaa ki fakaimasaki i tua atu ote atufenua mo te Sikima Masaki mo tino Tuvalu (TMTS).

#### **KAUPULE MO FENUA MAI TUA OTE LAUMUA**

33. Malu ote Takitaki Fono, mote 2015 alagaa tupe fesoasoani mo polotieki i fenua i tua atu ote laumua ko fanaka mai te \$1.2 miliona kite \$2.8 miliona. Te alagaa tupe faopoopo tenei \$377,168 ka tuku atu ki Kaupule mai lalo i alagaa tupe fesoasoani mo lago maloo ki ana atiakega fai.
34. Te masini fakasalalau tala i te letio ite matagaluega puke tala ka fakatupe kite aofaki e \$18,000 ke mafai o fakasoko te sevesi o fakasalalau ki fenua mai tua ote laumua kae \$500,000 ka fakatupe kiei te Matuaa Fusi e pelaa me se alagaa tupe e fakavae mo fesoasoani ki ana atiakega.

#### **OLAGA LEI MO FAKAPOTOPOTOGA**

35. Malu ote Takitaki Fono, au e fiafia o fakailoa atu me isi se Fakatokaga Fesoasoani mo Tino Se Katoatoa telaa e \$70 ite masina e pelaa me se alagaa tupe fesoasoani, telaa e nofo te fakatauga tupe kite \$80,640. Alagaa tupe fesoasoani ki matagaluega kolaa se polofiti ka fanaka kite \$15,000 i matagaluega takitasi mo fesoasoani kite fakeleiga o sevesi ki tino ote atufenua.

#### **MAFULIFULIGA O TAU O ASO**

36. Te Maloo e fiafia o fakailoa atu me ka isi se matagaluega fou ka fakatuu telaa e nono kite mafulifuliga o tau o aso mai lalo ite Ofisa ote Ulu ote Maloo, kote mea ke panaki mote aofagaga ki taupulega lei mo mafulifuliga o tau o aso i Tuvalu.

#### **TENITA**

37. Malu ote Takitaki Fono, te Maloo ko oti foki ne fakatuu te matagaluega o Tenita mai lalo ite Ofisa o te Ulu ote Maloo ke mafai o nono kite fakatokaga o pokotiaga ki mea tau tenita.

#### **GALUEGA MO FENUA I TUA ATU O TUVALU**

38. Malu ote Takitaki Fono mo Sui Malu kite Palamene, te aofaki \$196,000 ne fakatoka mo fakatuu se ofisa maluga I Niusila kote mea ke fakalausa te kau atu o Tuvalu ki fakapotopotoga i tua atu. Te ofisa maluga tenei ka fakatuu i Ueligitone.

## KAMUPANE ATE MAALO

39. Te Maalo ka lagomaloo ki ana Kamupane mo fesoasoani ki sevesi iloto I tou atufenua. Te alagaa tupe fesoasoani a te Maloo ki kamupane ka fanaka kite \$140,000 ite tausaga 2015 kite \$693,733. Alagaa tupe fesoasoani konei ka fakatupe ki kamupane konei e aofia ei: \$323,046 ka fakatupe kiei te Kamupane ote Iti, \$88,650 ki te Kamupane o Aveavega o Meli mo Oloolo Malaga, \$66,848 ka fakatupe ki te Pange o Tuvalu, \$32,952 e fakatupe kiei te Pange Atiake o Tuvalu kae \$182,237 ka fakatupe kite Kamupane o Fesokotakiga i Tuvalu mote tausaga 2015.

## LAFOGA KI FENUA I TUA ATU MO ALAGAA TUPE FAKAMAUMAU

40. Ko lafoga tusaga ki fenua i tua atu ka fanaka mai te \$295,967 kite \$1 miliona mote 2015. Te fanakaga tenei e fai ne lafoga e lafo ki fakapotopotoga kesekese kolaa e kau atu tatou kiei.
41. Ko nisi alagaa tupe fakamaumau telaa e aofia nisi tupe fakamaumau aka, tupe fakavae, tupe moli ki kaitalafu mo pasene ki tupe fakamaumau ka fanaka mai te aofaki \$288,047 kite \$1.2 miliona mote 2015. Te lasi ote fanakaga tenei e fai ite lasi o mafuilifuliga o tupe o nisi atufenua maise ki moliga o kaitalafu fakatasi mote pasene; ko tupe fakamaumau faopopo ka fakatupe foki kiei te faiga Palota ote Atufenua mote 2015.

## TUPE FESOASOANI MAI TAUGASOA

42. Malu ote Takitaki Fono, mo Sui Malu ki te Palamene, e siki tou loto fiafia kae fakafetai ki tou taugaso fesoasoani ki tulaga kesekese e lagomaloo ki atiakega o tou atufenua, telaa e lavea ne tatou i tausaga ko teka i tusaga taaua ko oti ne fakatino kite fesoasoaniga ki Tuvalu ke mafai o taunu ana tapulaa atiake. E fiafia au o siki taku fakafetai lasi ki fesoasoani mai taugaso ki te fakataunuuga o fakamoemoega kae talia fiafia te tumau o lagoon maloo ki atiakega fai o tou atufenua.
43. Ite tausaga 2015, alagaa tupe fesoasoani tumau kite Fakatauga Tupe e fakamau mai ne ROC Taiwan ki se aofaki e \$7.5 miliona tupe Amelika e penaa foki te fakatautauga mo tausaga mai mua. Mai tafa iei, ko alagaa tupe fesoasoani se tumau e maua mai nisi taugaso e nofo ki se aofaki e \$3.3 miliona mote tausaga 2015, telaa e 2.3 miliona te tupe fanaifo mai te 2014, e \$1.5 miliona ka fakatupe mai ne Ausitalia kae \$1.5 miliona tupe Amelika ka faka tupe mai ne te Pange ote Lalolagi (World Bank). Ko tupe fesoasoani konei ka fakaaoga mo lagoon maloo ki manakoga taua ote Fakatauga Tupe a te Maloo. Ko tupe maua konei ka faulu katoa kite Tupe Fakaleoleo telaa e aofia ite tulafono o fakatauga tupe telaa ka avaka atu kite Palamene mo se taliaga.

## TUSAGA FAKAOTI

44. Malu Takitaki Fono, Sui malu kite Palamene, a te Fakatauga Tupe mo te 2015 e mo tino Tuvalu. A te Fakatauga Tupe ne fakavae ki te iloiloga ne te Malo ate tulaga o tena maumea fakatasi mo te amanaia ne ia ana tagata. Ne lasi ate fakatupega mo tulaga ote ola lei mo akoakoga, pena foki ki te atiakega o fenua I tua o te laumua kae ke pena o lausa atu a te manuia mo te tokoukega o tino. E fakataua i konei kote taumafai atu tatou katoa o fakataunu ate muna tuku I te Kakeega II tela; ***I te tausaga***

*2015, e pela mote muna fakavae o te Atufenua ‘Tuvalu mo Te Atua’- ka fakataunugina ne tatou ate fakaleigaga o te tulaga lei mo feitu ki te Ola lei, akoakoga, olaga filemu, tokagamalie kae manuia mo Tuvalu.’*

- 45.** A te ataeao manuia e faite ne tatou ite fakamalosi atu o tou tino ki te atiakega o te Atufenua. Ate tusaga taua mo te taimi tenei, ko te fakatinoga o manakoga i loto ite Fakatauga Tupe. E fakamalosi atu au ki ministuli, ke galue fakatasi o fakataunu a fakamoemoega konei ite Fakatauga Tupe. E fia fakamalosi atufoki ki Kampane ate Malo (PEs) mo Pule Kaupule ke tumau ate taupulega tonu kae lei o lagomaloo ki fakamoemoega o te mMaalo o atiake ate tou atufenua pele Tuvalu.
- 46.** I te avanoaga tenei, e manako au o moli a te fakafetai lasi ki a laua katoa konei ne aofia ite fakatokaga o te Fakatauga Tupe mo te 2015, maise mo oku taina ite Kapineta, te DCC, Ministuli, Failautusi mo fanau galue ite Ofisa ote Palani mote Fakatauga Tupe. Ko mafai o fakataunugina ate fakamoemoega taua tenei kite Fakatauga Tupe 2015, mai luga i tusaga taaua kola ne fai ne koutou, tenei e moli atu iei ate agaga fakafetai kia koutou katoa.
- 47.** Te Malu ote Takitaki Fono, ko avaka ne au ate Fakatauga Tupe mo te tausaga 2015 ki mua ote Fale malu tenei o te Palamene.
- 48.** Fakafetai Lasi
- 49.** Tuvalu mo te Atua.